

COLUMNA

Bio diversità

AITA DERMONT-STUPAN

Biodiversità è ozendi in pled fitg proclamà. Cun raschun. Er a mai para che tut las creatiras duessan avair lur spazi per viver en equiliber sin questa terra.

Ma prendain ina giada dapart quest pled.

Bio: Il bel brumbel u buttun da Bio Suisse, in simbol plain speranza, garanteschia vivondas producidas tenor las directivas per in'agricultura biologica, v.d. in'agricultura en moda persistenta senza pesticides. Quai ma persvada. Jau sun pronta da pajar dapli per il product, e quai gnanc be per amur da mia sanadad, ma cunzunt per sustegnair in'agricultura pli natirala.

Ma la BIO Suisse n'è tuttina betg pronta da sustegnair l'iniziativa per aua da baiver netta e vivonda sauna. Pussaivel? Sco consumenta ma sent jau in pau engianada. Er blers purs da bio han resalvas e pledan cunter las iniziativas agraras. Ed in summa, ils purs: dapertut sin las stallas quest placat stupid cunter las iniziativas «extremas».



Per il Cussegl federal ed il parlament van las iniziativas er memia lunsch. «Na» ed anc ina giada «na».

Nunchapibel. Tge è qua uschè extrem, sch'ins pretenda aua da baiver netta. Tge «va memia lunsch»?

Ed ussa vegnin nus tar la diversità: Quai ch'è per tscherts umans «extrem» è per auters tut normal e logic. Quai che va per ils ins memia lunsch, è per ils auters gist dretg u na basta gnanc. Tschertins dorran/han/vulan adina dapli. Auters èn cuntents cun pauc. Mintg'uman è auter ed ha ses basegns. Mintga creatira è autra e dovra ses agen spazi da viver. Tut la

creaziun, ina diversità enorma, però er in cumbat.

Tschertas plantas domineschan e stgatschan autras. Bestgas grondas e pitschnas sa maglian e chatschan l'ina a l'autra a chantun. Tuttina chattass forsa tut questa diversità ses equiliber, en il ciclus da la natira. Però l'uman, il pli fegher, quel crai ch'el sappia tut e possa far tut, senza resguard. Basta ch'i giaja «bain» cun el. Basta che l'economia flureschia e creschia onn per onn. Pertge stagnaziun è regress. E regress è – uschia vegni fatg tema a la gliעד – murir da la fom.

Ins giaja be en il supermartgà. La diversità da mangiativas è enorma. La cucagna! Direct grev da decider tge cumprar. Bio, superprix u be normal. Entschaver a leger quai ch'è scrit be pitschnin: Produci en... Cuntegna...

Ou, jau hai emblidà ils egliers. Mabain, cumprain ina giada quai ch'è acziun en il pachet dubel.

Aita Dermont-Stupan è figlia da purs e pastra.